

Саломни кенг ёйиш ва акса урганда Аллоҳга ҳамд айтиш | Сийрат дарслари (355-дарс)



19:00 / 28.11.2025 853

794. Абу Ҳурайра розияллоҳу анҳудан ривоят қилинади:

«Бирортангиз бир биродарини учратса, салом берсин. Ораларини дарахт, девор ёки тош ажратса, қайта учрашганларида яна салом берсин».

Абу Довуд ривоят қилган.

795. Анас ибн Молик розияллоҳу анҳудан ривоят қилинади:

«У ёш болалар олдидан ўтаётиб, уларга салом берди ва: «Набий соллаллоҳу алайҳи васаллам буни қилардилар», деди».

Бухорий ва Муслим ривоят қилишган.

796. Абу Ҳурайра розияллоҳу анҳудан ривоят қилинади:

«Расулуллоҳ соллаллоҳу алайҳи васаллам: **«Отлиқ пиёдага, пиёда ўтирганга ва озчилик кўпчиликка салом беради ва кичик каттага салом беради»**, дедилар».

Бухорий, Муслим ва Термизий ривоят қилишган.

797. Абдуллоҳ ибн Умар розияллоҳу анҳумодан ривоят қилинади:

«Бир киши Расулуллоҳ соллаллоҳу алайҳи васалламга салом берди. У зот таҳорат ушатаётган эдилар, саломга алик олмадилар».

Муслим ривоят қилган.

798. Қатода розияллоҳу анҳудан ривоят қилинади:

«Мен Анасга: «Набий соллаллоҳу алайҳи васалламнинг саҳобаларида қўл олиб кўришиш бормиди?» дедим. «Ҳа», деди».

Бухорий ривоят қилган.

799. Анас ибн Молик розияллоҳу анҳудан ривоят қилинади:

«Набий соллаллоҳу алайҳи васалламнинг ҳузурларида икки киши акса урди. Шунда у зот улардан бирига тилак билдирдилар ва бошқасига тилак билдирмадилар. Сўнг у зотга бу ҳақда айтилди. **«Буниси Аллоҳга ҳамд айтди. Униси эса, Аллоҳга ҳамд айтмади»**, дедилар».

Бухорий ва Муслим ривоят қилишган.

«Расулуллоҳ соллаллоҳу алайҳи васаллам» китобидан

Ушбу китоб Ўзбекистон Республикаси Дин ишлари бўйича қўмитанинг 2022 йил 30 ноябрдаги 03-07/9078-рақамли хулосаси асосида чоп этилган.